

# 佛說藥師如來本願經

達摩笈多譯

妙諦法音

2024年8月25日

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛說藥師如來本願經

如是我聞：一時，婆伽婆遊行人間，至毘舍離國，住樂音樹下。

與大比丘眾八千人俱、菩薩三萬六千、國王、大臣、婆羅門、居士、天、龍、阿修羅、捷達婆、伽樓荼、緊那羅、摩呼羅伽等大眾圍遶於前，〔而為〕說法。

爾時，曼殊室利法王子，承佛威神，即從座起，偏露一膊，右膝著地，向婆伽婆，合掌曲躬。白言：世尊！惟願演說諸佛名號，及本昔所發殊勝大願。令眾生聞已，業障消除，攝受來世正法壞時諸眾生故。

爾時，婆伽婆讚曼殊室利童子言：善哉！善哉！曼殊室利！大慈悲者！起無

量悲，勸請我說，為欲義利種種業障所纏眾生，饒益安樂諸天人故。

曼殊室利！當善憶念，聽我所說。

時，曼殊室利童子，樂聽佛說。白言：唯然，世尊！

佛告曼殊室利：東方過此佛土十恒河沙等佛土之外，有世界名淨琉璃。彼土有佛，名藥師琉璃光，如來。應。正遍知。明行足。善逝。世間解。無上士。調御丈夫。天人師。佛世尊。

曼殊室利！彼世尊藥師琉璃光如來，本行菩薩行時，發十二大願。

何者十二？

第一大願：願我來世，於佛菩提得正覺時。自身光明熾然，照曜無量無數無邊世界。三十二丈夫大相，及八十小好，以為莊嚴。我身既爾，令一切眾生如我無異。

第二大願：願我來世，得菩提時。身如琉璃，內外清淨，無復瑕垢。光明曠

大，威德熾然，身善安住，焰網莊嚴，過於日月。若有眾生，生世界之間，或復人中，昏暗及夜，莫知方所。以我光故，隨意所趣，作諸事業。

第三大願：願我來世，得菩提時。以無邊無限智慧方便，令無量眾生界受用無盡，莫令一人有所少乏。

第四大願：願我來世，得菩提時。諸有眾生行異道者，一切安立菩提道中。行聲聞道、行辟支佛道者，皆以大乘而安立之。

第五大願：願我來世，得菩提時。若有眾生，於我法中，修行梵行。此諸眾生無量無邊，一切皆得不缺減戒，具三聚戒，無有破戒趣惡道者。

第六大願：願我來世，得菩提時。若有眾生，其身下劣，諸根不具，醜陋、頑愚，聾盲、跛躄，身攣背偻，白癩、癡狂，若復有餘種種身病。聞我名已，一切皆得諸根具足，身分成滿。

第七大願：願我來世，得菩提時。若有眾生，諸患逼切，無護無依，無有住

處，遠離一切資生醫藥，又無親屬，貧窮可愍。此人，若得聞我名號，眾患悉除，無諸痛惱，乃至究竟無上菩提。

第八大願：願我來世，得菩提時。若有女人，為婦人百惡所逼惱故，厭離女身，願捨女形。聞我名已，轉女人身成丈夫相，乃至究竟無上菩提。

第九大願：願我來世，得菩提時。令一切眾生，解脫魔網。若墮種種異見稠林，悉當安立置於正見，次第示以菩薩行門。

第十大願：願我來世，得菩提時。若有眾生，種種王法繫縛、鞭撻、牢獄、應死，無量災難，悲憂煎迫，身心受苦。此等眾生，以我福力，皆得解脫一切苦惱。

十一大願：願我來世，得菩提時。若有眾生，飢火燒身，為求食故，作諸惡業。我於彼所，先以最妙色香味食，飽足其身。後以法味，畢竟安樂，而建立之。

十二大願：願我來世，得菩提時。若有眾生，貧無衣服，寒熱蚊虻，日夜逼惱。我當施彼隨用衣服，種種雜色，如其所好。亦以一切寶莊嚴具，花鬘、塗香、鼓樂、眾伎，隨諸眾生所須之具，皆令滿足。

此十二大願，是彼世尊藥師琉璃光，如來。應。正遍知，行菩薩時，本昔所作。

復次，曼殊室利！藥師琉璃光如來，所有諸願，及彼佛土功德莊嚴，乃至窮劫，說不可盡。

彼佛國土，一向清淨。無女人形、離諸欲惡、亦無一切惡道苦聲。

琉璃為地，城闕、垣墻、門窗、堂閣、柱樑、斗拱、周匝羅網，皆七寶成，如極樂國。淨琉璃界，莊嚴如是。

於其國中有二菩薩摩訶薩，一名日光，二名月光。於彼無量無數諸菩薩眾，最為上首，持彼世尊藥師琉璃光如來正法之藏。

是故，曼殊室利！信心善男子善女人，應當願生彼佛國土。

爾時，世尊復告曼殊室利童子言：曼殊室利！或有眾生，不識善惡，多貪無厭，不知布施及施果報，愚癡無智，缺於信根，聚財護惜，不欲分施。此等眾生，無施心故，見乞者來，其心不喜，如割身肉。

復有無量慳貪眾生，自不受用，亦不欲與父母妻子，況奴婢作使及餘乞人！

此等眾生，人間命終，生餓鬼道，或畜生道。

由昔人間，曾得聞彼「藥師琉璃光如來」名號故，或在鬼道，或畜生道，如來名號暫得現前，即於念時，彼處命終，還生人道。得宿命智，怖畏惡趣，不樂欲樂，好行惠施，讚歎施者。一切所有，悉能捨施。漸以頭目、手足、血肉、身分，皆與求者，況餘財物！

復次，曼殊室利！有諸眾生，雖奉如來，受持學句。然，破戒、破行、破於正見。或受學句，護持禁戒，然不求多聞，不解如來所說修多羅中甚深之義。

或復多聞，而增上慢，自是非他，嫌謗正法，為魔伴黨。

此等癡人，及餘無量百千俱胝那由他眾生行邪道者，當墮地獄。此等眾生，應於地獄流轉無期。

以得聞彼「世尊藥師琉璃光如來」名號故，於地獄處，彼佛威力，如來名號暫得現前，即時捨命，還生人道。正見精進，淳善淨心，便能捨家，於如來教中，出家學道，漸次修行菩薩諸行。

復次，曼殊室利！或有眾生，以妬忌故，但自稱讚，不讚他人。

此諸眾生，以自高輕他故，於三惡道，無量千歲，受諸苦毒。

過無量千歲已，於彼命終，生畜生趣，作牛馬駝驢，鞭杖捶擊，飢渴逼惱，身負重擔，隨路而行。若生人道，常居下賤，為人奴婢，受他驅役。

若昔人中，聞彼「世尊藥師琉璃光如來」名號者，以此善根，眾苦解脫。諸根猛利，聰慧博識，恆求善本，得與良友常相隨逐。能斷魔胃，破無明殼，竭

煩惱河，解脫一切生老病死憂悲苦惱。

復次，曼殊室利！有諸眾生，好喜乖離，更相鬥訟。

此等互起惡心眾生，身口及意，恒作諸惡，為欲相損，各各常以無益相加。或告林神、樹神、山神、塚神，種種別神。殺諸畜生，取其血肉，祭祀一切夜叉羅刹食血肉者。書怨人字，并作其形，成就種種毒害、呪術、厭魅、蠱道、起屍鬼呪，欲斷彼命及壞其身。由聞「世尊藥師琉璃光如來」名號故，此諸惡事，不能傷損，皆得互起慈心、益心、無嫌恨心。各各歡悅，更相攝受。

復次，曼殊室利！此諸四眾，比丘、比丘尼、優婆塞、優婆私，及餘信心善男子善女人等受八分齋。或復一年，或復三月，受持諸戒。以此善根，隨所喜樂，隨所願求。

若欲往生西方極樂世界阿彌陀如來所者，由得聞彼「世尊藥師琉璃光如來」名號故，於命終時，有八菩薩乘空而來，示其道徑。即於彼界，種種異色波頭

摩花中自然化生。

若復此人，欲生天上，即得往生。本昔善根無有窮盡，不復更生諸餘惡趣。

天上命盡，當生人間，為轉輪王，四洲自在，安立無量百千俱胝那由他眾生於十善業道。

或復生於刹利大族、婆羅門大族、居士、大家<sup>1</sup>。金銀、粟帛、倉庫盈滿。形色具足，自在具足，眷屬具足，勇健多力如大力士。

若有女人，得聞說此如來名號，至心受持，此人於後，永離女身。

爾時，曼殊室利童子白佛言：世尊！我於後時，以彼世尊藥師琉璃光如來名號，於信心善男子善女人所，種種方便，流布令聞。乃至睡中，亦以佛名覺寤其耳。

---

<sup>1</sup> 大家，女之尊稱。 家，音與義為姑。

若受持此經，讀誦宣說。或復為他，分別開解。若自書，若令人書。若取經卷，五色淨綵以盛裹之，灑掃淨處，以安置之。持種種花、種種香、塗香、花鬘、寶幢、幡蓋，而用供養。爾時，四大天王與其眷屬，并餘百千俱胝那由他諸天，皆詣其所。

若此經卷流行之處，若復有人誦持此經。以得聞彼「世尊藥師琉璃光如來」名號，及本昔所發殊勝大願故，當知是處，無復橫死。亦復不為諸鬼所持，奪其魂魄。設已奪者，還復如故。

佛言：如是。如是，曼殊室利！如汝所說。

曼殊室利！信心善男子善女人，若欲供養彼如來者：

此人，應作如來形像。七日七夜，受八分齋，食清淨食。

於清淨處，散種種花，燒種種香，以種種繒綵，種種幡幢，莊嚴其處。

澡浴清潔，著新淨衣。應生無垢濁心，無怒害心。於一切眾生，起利益心，

慈悲喜捨平等之心。

鼓樂歌讚，右遶佛像，應念彼如來本昔大願，并解釋此經。

如所思念，如所願求，一切所欲，皆得圓滿。

求長壽，得長壽。求福報，得福報。求自在，得自在。求男女，得男女。

或復有人，忽得惡夢，或見諸惡相，或怪鳥來集。於其住所，百怪出現。

此人，若能以種種眾具，供養恭敬彼藥師琉璃光如來者，一切惡夢惡相，不吉祥事，皆悉隱沒。

或有水怖、火怖、刀怖、毒怖、懸嶮之怖，惡象、獅子、虎、狼、熊、羆、毒蛇、惡蝎、蜈蚣、蚰蜒，如是等怖。憶念供養彼如來者，一切怖畏，皆得解脫。

若他國侵擾、賊盜反亂。如是等怖，亦應念彼如來，恭敬尊重。

復次，曼殊室利！若有信心善男子善女人，乃至盡形受三歸依，不事餘天。

或持五戒，或持十戒，或持菩薩一百四戒。或復出家，受持比丘二百五十戒，若比丘尼受持五百戒。於隨所受中，毀犯禁戒，畏墮惡道。若能供養彼世尊藥師琉璃光如來者，決定不受三惡道報。

或有女人，臨當產時，受於極苦。若能稱名供養彼世尊藥師琉璃光如來者，速得解脫。所生之子，身分具足，形色端正，見者歡喜。利根，聰明，安隱，少病，無有非人奪其魂魄。

爾時，世尊告慧命阿難言：阿難！如我稱揚彼「世尊藥師琉璃光如來」所有功德，汝信受耶？汝於如是「諸佛如來甚深境界」，多生疑惑？

時，慧命阿難白佛言：大德世尊！我於如來所說法中，無復疑惑。

何以故？一切如來，身口意行，無不清淨。

世尊！此日月，有如是大神通，有如是大威力，可令墮落。須彌山王，可得移動。諸佛所言，無有差異。

大德世尊！或有眾生，信根不具。聞說「如來佛境界」已，作是思惟：「云何但念彼如來名，獲爾許功德？」心不信受，生於誹謗。此等長夜無義饒益，當墮苦趣。

佛言：阿難！若彼如來所有名號，入其耳中。此人墮惡道者，無有是處。

阿難！諸佛境界，誠為難信。汝今信受，應知皆是如來威力。非一切聲聞、辟支佛地所能信受，唯除一生補處菩薩摩訶薩。

阿難！人身難得。於三寶中，信敬尊重，亦難可得。聞彼如來名號，倍難於此。

阿難！彼世尊藥師琉璃光如來，無量菩薩行，無量諸巧便，無量曠大願。我欲一劫若過一劫，說彼如來菩薩行願，乃至窮劫，彼世尊藥師琉璃光如來本昔所行及殊勝大願，亦不究盡。

爾時，眾中有菩薩摩訶薩，名曰救脫，即從座起，偏露一體，右膝著地，向

婆伽婆，合掌曲躬。白言：大德世尊！於未來世，當有眾生，身嬰重病，長患羸瘦，不食飢渴，喉脣乾燥，死相現前，目無所見。父母、親眷、朋友、知識啼泣圍遶。其人屍形臥在本處，閻摩使人引其神識，置於閻摩法王之前。此人背後有同生神，隨其所作，若罪若福，一切皆書，盡持授與閻摩法王。時，閻摩法王推問其人，算計所作，隨善隨惡而處分之。若能為此病人歸依彼世尊藥師琉璃光如來，如法供養，即得還復。此人神識得迴還時，如從夢覺，皆自憶知。或經七日、或二十一日、或三十五日、或四十九日。神識還已，具憶所有善惡業報。由自證故，乃至失命，不造惡業。是故，信心善男子善女人，應當供養藥師如來。

爾時，慧命阿難問救脫菩薩言：善男子！應云何供養彼世尊藥師琉璃光如來也？

救脫菩薩言：大德阿難！若有病人，欲脫重病。當為此人，七日七夜，受八

分齋。當以飲食及種種眾具，隨力所辦，供養比丘僧。晝夜六時，禮拜供養彼世尊藥師琉璃光如來。四十九遍讀誦此經。燃四十九燈。應造七軀彼如來像，一一像前各置七燈，一一燈量大如車輪，或復乃至四十九日，光明不絕。當造五色綵幡，長四十九尺。

復次，大德阿難！灌頂剎利王等。若災難起時，所謂：人民疾疫難、他方侵逼難、白界反逆難、星宿變怪難、日月薄蝕難、非時風雨難、過時不雨難。爾時，此灌頂剎利王，當於一切眾生起慈愍心，赦諸繫閉。依前所說供養法式，供養彼世尊藥師琉璃光如來。時，灌頂剎利王用此善根，由彼世尊藥師琉璃光如來本昔勝願故，其王境界，即得安隱，風雨以時、禾稼成就、國土豐熟。一切國界所有眾生，無病安樂，多生歡喜。於其國界，亦無夜叉、羅剎、毘舍闍等諸惡鬼神擾亂眾生。所有惡相，皆即不現。彼灌頂剎利王，壽命色力，無病自在，並得增益。

爾時，慧命阿難問救脫菩薩言：善男子！云何已盡之命，而可更延？

救脫菩薩言：阿難！汝豈不聞如來所說「九橫死」耶？

是故，教以呪藥方便。或有眾生得病非重，然無醫藥及看病人；或復醫人，療治失所，非時而死，是為初橫。第二橫者，王法所殺。第三橫者，遊獵、放逸、姪醉無度，為諸非人害其魂魄。第四橫者，為火所燒。第五橫者，為水所溺。第六橫者，入獅子、虎豹、諸惡獸中。第七橫者，飢渴所困，不得飲食，因此致死。第八橫者，厭禱、毒藥、起屍鬼等，之所損害。第九橫者，投巖取死。是名如來略說大橫，有此九種，其餘復有無量諸橫。

爾時，眾中有十二夜叉大將，俱在會坐，所謂：

宮毘羅大將	跋折羅大將	迷佉羅大將	安捺羅大將
安怛羅大將	摩涅羅大將	因陀羅大將	波異羅大將
摩呼羅大將	真達羅大將	招度羅大將	鼻羯羅大將

此等十二夜叉大將，一一各有七千夜叉以為眷屬，皆同一聲，白世尊言：我等今者蒙佛威力，得聞「世尊藥師琉璃光如來」名號已，不復更有惡道之怖。我今相與，皆同一心，乃至壽盡，歸依佛、歸依法、歸依僧。皆當荷負一切眾生，為作義利，饒益安樂。隨於何等村城聚落阿蘭拏處，若流布此經，若復持彼「世尊藥師琉璃光如來」名號，親近供養者。我等眷屬，衛護是人，皆使解脫一切苦難。諸有所求，悉令滿足。

爾時，世尊讚諸夜叉大將言：善哉！善哉！大夜叉將！汝等若念彼世尊藥師琉璃光如來恩德者，當念饒益一切眾生。

爾時，慧命阿難白佛言：世尊！此經何名？云何奉持？

佛言：阿難！此法門者，名為《藥師琉璃光如來本昔所發殊勝大願》，當如是持。名為《十二夜叉大將自誓》，當如是持。名為《淨一切業障》，當如是持。

時，婆伽婆說是語已。

諸菩薩摩訶薩、諸大聲聞、國王、大臣、婆羅門、居士，及一切大眾，阿修羅、捷達婆等，聞佛所說，歡喜奉行。

佛說藥師如來本願經

無上妙法喜見聞 藥師如來願無盡 讀誦修持為他說 生善集福消災殃

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地

 [mfbm.hk](http://mfbm.hk)